

दिनांक 02.02.2025
समय: 18.45 बजे

आकाशवाणी जयपुर—अजमेर

प्रादेशिक समाचार

- मुख्यमंत्री भजनलाल शर्मा कह्यो—साल 2027 तांडि प्रदेश मांय काश्तकारां ने दिन मांय ई बिजली मुहैया करायी जायेला।
- राज्य मांय एग्रीस्टैक योजना 5 फरवरी ऊं लागू व्हेला—इण रे तैत पंजीकृत हर काश्तकार ने 11 अंकां री खास फार्मर आई.डी. दी जायेला।
- विश्व आर्द्र भूमि दिवस माथे आज प्रदेश मांय केर्ड कार्यक्रम व्हया।
- भारत आई.सी.सी. अंडर-19 महिला टी-20 क्रिकेट विश्व कप रो खिताब लगातार दूजी बार जित्यो।

000

मुख्यमंत्री भजनलाल शर्मा कह्या है के सरकार काश्तकारां ने मजबूत, खुशहाल अर आत्मनिर्भर बणावण सारू संवेदनशीलता रे साथे काम कर री है। मुख्यमंत्री आज करौली ज़िला रा कैमरी गांव मांय व्हया किसान सम्मेलन मांय बोल रह्या है। ई मौके वणा कह्या के राज्य सरकार अगूणी राजस्थान री मांग ने मंजूर करता रामजल सेतु परियोजना सारू डी.पी.आर. बणावण रो काम सरू कर दियो है। श्री शर्मा कह्यो के साल 2027 तांडि प्रदेश मांय काश्तकारां ने दिन री बगत बिजली मुहैया करवाई जायेला।

.....
मुख्यमंत्री कैमरी धाम मिंदर मांय विकास रा काम करावण, बालिका छात्रावास खोलण अर पशु चिकित्सालय ने क्रमोन्नत करण रो ई भरोसा दियो। मुख्यमंत्री आज संवारा 16वीं जयपुर मैराथन ने रवाना कर्या। ई मौके श्री शर्मा कह्यो के राज्य सरकार नौजवानां री आस ने पूरी करण रो काम कर री है। वणा कह्यो के नौजवान रो ई देश अर प्रदेश री प्रगति मांय अहम भूमिका है अर मैराथन ऊं स्वरथ रहवण री प्रेरणा मिले है। मुख्यमंत्री कह्यो के राज्य सरकार खेल प्रतिभावां ने हर तरह ऊं बधावो दे री है। प्रदेश आवता बरस मांय खेलो इंडिया गेम्स री मेजबानी करण जा रह्या है जिण ऊं नौजवानां री सहभागिता महताऊ व्हेला।

000

प्रदेश मांय एग्रीस्टैक योजना 5 फरवरी ऊं लागू व्हेला। इण रे तैत काश्तकारां ने फार्मर रजिस्ट्री आई.डी. बणावावण मांय मदद करी जायेला। काश्तकारां ने डिजिटल रूप ऊं समर्थ बणावण कानी आ एक महताऊ पहल करी ज्यी है। इण सारू सगळा जिला मांय शिविर लगाया जायेला। योजना रे तैत हर पंजीकृत काश्तकार रे 11 अक्षरां री खास फार्मर आईडी दी जायेला। एग्रीस्टैक योजना ऊं काश्तकारां ने केर्ड फायदा ई मिलेला। इण मांय पी.एम. किसान सम्मान निधि किश्त रो सरल भुगतान, फसल बीमा रो फायदो, फसल खराबा री हालात मांय बोगी पिछाण अर सरकारी भाव माथे खरीद सारू स्वचालित पंजीकरण भेळा है। इण रे साथे ई केन्द्र सरकार री महत्वांकाक्षी योजना, किसान क्रेडिट कार्ड योजना समेत न्यारी—न्यारी कल्याणकारी योजनावां तांडि काश्तकारां री पहुंच ने सरल बणावेला।

000

राज्यपाल हरिभाऊ बागडे राष्ट्र प्रथम री भावना रे साथे सगळा ऊं मिलने काम करण अरज करी है। श्री बागडे आज बीकानेर मांय कह्यो के विकसित भारत रा संकल्प ने साकार करण सारु सगळा ने आपरी भागीदारी निभावणी घेला। श्री बागडे समाज सेवी अर उद्यमी हरखचंद नाहटा री याद मांय व्ह्या जळसा मांय आ बात कही। ई मौके राज्यपाल श्री नाहटा री याद मांय स्मारक सिक्का रो ई अनावरण करयो। राज्यपाल कह्यो के श्री नाहटा कारोबार रे साथे-साथे जनसेवा सारु ई महताऊ योगदान दियो। राज्यपाल देशनोक रा करणी माता मिन्दर मांय दर्शन करने विधिपूरण पूजा-अर्चना करी। वणा प्रदेशवासियां री खुशहाली सारु मंगल कामना करी।

000

विधानसभा अध्यक्ष वासुदेव देवनानी कह्यो कैंसर रोग रे प्रति समाज मांय जाग जगावणे जरुरी है, जिण ऊं लोग मांय बगतसर जांच अर ईलाज सारु बधावो मिल सके। श्री देवनानी आज जयपुर मांय व्ह्या कैंसर विजेता जळसा मांय बोल रह्या हा। ई मौके वणा कयो के आत्मविश्वास अर धीरज रे साथे ई बीमारी रो मुकाबलो कर्यो जा सके है।

जळसा मांय राजस्थान समेत दूजा राज्यां रा कैंसर माथे जीत हासिल करण वाळा हिस्सो लियो। कार्यक्रम मांय कैंसर ऊं जूझने स्वस्थ जीवन जी रह्या विजेतावां रो सन्मान ई करी ज्यो अर वणा आपरा अनुभव ई साझा कर्या।

000

राजस्थान लोक सेवा आयोग कानी ऊं आज आरएसएस प्री-2024 परीक्षा व्ही। आ परीक्षा राज्य रा 38 जिलां मांय दो हजार पैंतालीस केन्द्रां माथे व्ही।

000

राज्य रा सगळा स्कूलां मांय काले भेळा सूर्य नमस्कार कर्यो जाएला। शिक्षा महकमा मुजब ओ आयोजन संवारा सवा दस बज्यां सगळा सरकारी अर प्राइवेट स्कूलां मांय घेला। ई सारु स्कूलां मांय पढेसरां ने सूर्य नमस्कार रो अभ्यास ई करायी ज्यो है। ध्यान जोग है के लाली साल एक करोड़ तैनीस लाख पढेसर सूर्य नमस्कार करने रिकॉर्ड बणायो हो।

000

आज विश्व आर्द्र भूमि दिवस है। इण री सरुआत साल 1971 मांय व्ही ही। जद पर्यावरणविदां आर्द्र भूमि यानि दलदली भूमि ने बचावण री अरज करी ही। इण साल आर्द्र भूमि दिवस रो मुद्दो है साझा भविष्य के लिए आर्द्र भूमि का संरक्षण। पर्यावरण विदां रो कहणो है के आर्द्र भूमि ऊं भविष्य री पीढियां ने फायदा सारु इण प्राकृतिक पर्यावास ने बचावणे जरुरी है। झालावाड़ मांय ई मौके वेटलैंड बड़बेला तालाब मांय आयोजित करी ज्यो। कार्यक्रम मांय ज़िला कलेक्टर अजय सिंह राठौड़ कह्यो के प्रवासी पखेरुआं री आवक ने देखता अर वां रा स्वतत्र विचरण सारु आर्द्र भूमि ने साफ-सुथरी राखणे चाहिजे। सवाई माधोपुर मांय विश्व वेटलैंड दिवस रे मौके राजीव गांधी क्षेत्रीय प्राकृतिक विज्ञान संग्रहालय मांय चित्रकला होड़ व्ही। ध्यानजोग है के अजै ई यूनेस्को कानी ऊं उदयपुर ने वेटलैंड सिटी रो दर्जा दीरी ज्यो है। उठिने, पाली जिला रा गिरादडा मांय वनमंत्री संजय शर्मा ऑक्सीजोन हब री नींव धरी। इण मांय देश रा न्यारा-न्यारा हलकां मांय एक लाख ऊं बत्ती प्रजातियां रा पौधा लगाया जायेला अर घणा जंगल विकसित कर्या जायेला।

000

वसंत पंचमी रो तिवार आज मनायो जावे। राष्ट्रपति द्रौपदी मुर्मू शिक्षा अर ज्ञान ऊं जुड़या ई पर्व माथे भारत ने दुनिया रा ज्ञान केंद्र रा रूप मांय थापित करण री कामना करी है। वसंत पंचमी माथे प्रदेशभर मांय मन्दिरां मांय खास पूजा अर्चना करीजी।

वसंत ऋतु रे आवण माथे मनाया जावण वाळा ई तिवार ने कुदरत अर ज्ञान रो पवित्र संगम मान्यो जावे है। एक रपट-

000

प्रयागराज महाकुंभ मांय तीजो अमृत स्नान काले घेला। ई सारु न्यारा-न्यारा ठेसनां ऊं चार सौ महाकुंभ खास रेलगाडियां चलावेला। इण ऊं लाखों श्रद्धालुआं सारु जातरा आरामजोग घेला। प्रयागराज जंक्शन समेत आठ दूजा रेलवे ठेसनां माथे मेडिकल अर पैरामेडिकल स्टाफ वाळा मेडिकल बूथ ई बणायी ज्या है। अमृत स्नान रे मौके श्रद्धालुआं री घणी आवक ने देखता हिफाजत

रा करड़ा बन्दोवस्त करी ज्या है। इण रे अलावा रेलवे केर्ड होल्डिंग एरिया ई बणाया है, जिण ऊं ठेसनां माथे घणी भीड़ भेळी नी होवे अर जातरी आपरी रेलगाड़ी री बाट जोह सके है।

000

डीग जिला मांय ऑपरेशन एंटी वायरस रे तैत लारला साल कोई डेढ हजार साइबर अपराधियां ने पकडी ज्या, जिण रा कब्जा ऊं पुलिस एक करोड़ रुप्पा नकद, दो हजार ऊं बत्ती मोबाइल फोन अर तीन हजार ऊं बत्ती सिम कार्ड अर एटीएम कार्ड जब्त करी ज्या है। भरतपुर रेंज रा पुलिस महानिरीक्षक राहुल प्रकाश बतायो के डीग जिला मांय होवण वाळा साइबर अपराधां मांय घणी कमी आई है।

000

भारत आईसीसी अंडर-19 महिला टी-20 क्रिकेट विश्व कप रो खिताब लगातार दूजी बार जीत लियो है। मलेशिया रा क्वालालाम्पुर मांय आज फाइनल मुकाबला मांय भारत दक्षिण अफ्रीका ने 9 विकेट ऊं हरा दिया। भारत 83 रन रो लगस 12वां ओवर मांय एक विकेट रा नुकसाण माथे आसानी ऊं हासिल कर लियो। प्रधानमंत्री नरेन्द्र मोदी भारतीय महिला क्रिकेट टीम ने बधाई देवता ई जीत ने बेहतर टीम वर्क अर संकल्प री जीत बताया है। सोशल मीडिया माथे आप रा संदेश मांय श्री मोदी कहयो के इण ऊं केर्ड खिलाड़ियां ने प्रेरणा मिलेला। वठे ई भारत अर इंग्लैंड रे बीचे पांचवों अर आखिरी टी-20 क्रिकेट मैच आज सिज्यां सात बज्यां ऊं मुंबई मांय खेल्यो जाएला। भारत पहला ई श्रृंखला मांय 3-1 री बढ़त बणा लिया है। ई सीरीज रे पछे पांच फरवरी ऊं दोन्यू टीमां रे बीचे तीन एक दिन रा मैच खेल्या जाएला।

000

राज्य मांय काले ऊं एक नुवो आथूणी विक्षोभ सक्रिय होवण रा आसार है। इण रा असर ऊं केर्ड ठोड़ां बिरखा री आस है। मौसम केन्द्र जयपुर रा निदेशक राधेश्याम शर्मा बतायो के इण रे पाछे पांच फरवरी ऊं तापमान मांय 2 ऊं 3 डिग्री सेल्सियस री कमी आ सके है।

000